

## Präsidentinnenbericht 2025

Am 4. März 2025 si mir mit 47 Froue i ds nöie Vereinsjahr gstartet, geng wie geng hei mir dä Abe miteme Apèro gstartet, nähr verhandlet und de mit Kaffi und Dessert abgchlosse. Dr Erlös vo de Glückspäckli isch em Samariterverein Zäziwil gspändet worde, zum Ersetze vom Defi-Akku bir Mehrzwäckhalle. Mir hei wieder uf d Mithilf vo viune Hälferinne dörfe zeue, wo üs bim Verteile vo de bluemige Fruehligsgrüssli unger d Arme griffe hei. Es si 18 Persone i 8 verschiedene Wohn- und Pflegeinstitutione überrascht worde.

Ab mitti März bis afang Mai ha ig üse Verein a verschiedene Versammlige verträte: bim Orts- und Verkehrsverein im Waldmätteli ds Zäziwil, bim Verband Berner Landfroue in Landiswil, bim Schwizerisch gmeinnützig Froueverein Bern-Freiburg in Kirchberg und bir Frouezentrale in Bern. Es isch immer spannend und interessant dr Ustuusch mit de verschiedene Vereinsdelegatione, wie die versch Vereine und Verbänd i ihrer Region funktioniere und immer wieder überraschend, was mir alles d Stand bringe, we mir guet zäme schaffe.

Dr Maibummel het ou i däm Vereinsjahr e 2. Alouf bruucht, aber es paar Froue hei e Blueschtwanderig über Länzlige unger d Füess gnoh: miteme Aperöli ungerwägs und emne gmuetliche Usklang im Bahnhofli. I ha a däm Abe üse Verein ar HV vor Frouezentrale Bern verträte.

Ändi Mai si siebe Froue und ei Maa zum Baumgartner Heidi ir Honigschnitte.ch Z`visite und hei dert allergartig interessants und verblüffends über d Biene-Maja und ihri Beii-Kolleginne erfahre.

Im Juni bi i am Vereinstag vom Berner Landfoueverband derbi gsi.

Afangs Summerferie si 30 Froue und 3 Manne uf d Vereinsreis nach Bärn. Zersch het üs dr Nationalrat Rüeegsegger dür d Rüümlichkeite vom Bundeshuus gfüeht und het üs allerhand verblüffends, interessants und ou lustigs verzeut. När si mir zum Münster glofe und hei ire Fuehrig o dert viel spannends erfahre. Einigi hei sichs nid lah näh und ou no vom Münsterturm e Blick uf Bärn ds gniesse, trotz hochsummerliche Temperature. När isches afa nache gsi für es Apèro-Zvieri im Schwellemätteli. Mitem Trämli und de när ds Gümlige ufe Zug hei mir dr Heiwäg aträte. Es isch e spannende und lustige Usflug gsi.

Afangs Septämber si mir mit 110 Froue und Manne Ü70 uf d Seniorereis. Zersch hei mir no chli wächselhafts Wätter gha, aber die 3 Care vom Hirsbrunner Reise hei üs de uf Rüscheegg id Chiuche gfuehrt und de när a Schwarzsee und ds Wätter isch geng wie besser worde. Nacheme feine Ässe mit Dessert und emne gsellige Namitag, si mir de chli überland gfahre, hurti e Blick ufe Murtesee gworfe und de när ume üsi Heimat agstüuret. Aui si zfriede und glücklich usem Car gstiege.

Ar Brächete ändi Septämber hei mir zersch chli bibberet, ob äch ds Wätter einigermasse mit spielt, aber Petrus isch de Zäziwiler guet gstimmt gsi und es si ca 600 Flammbrötli gschnouset worde. Die wo eis verwütscht hei, heis ömu gruehmt. Ou ir Brocki isch wieder e Huufe gange und es isch mängisch es richtigs Drück gsi i üser Brocki, aber so macht verchoufe äbä Spass, chli nusche, häufe useläse, chli händele und de ikassiere. Ou d Brockifroue hei e lustige Tag gha. Am Nächste Tag hei mir de wieder ufgruumt nach derä Bombestimmig, ussortiert und gmistet. Mir hei veiechli ztüe gha, bis dass es ume chliie Gattig macht.

Nach de Herbstferie mache mir dr Tuusch- und Gänggelimärit, so hei die Ching i de Ferie chli Zyt zum ihri Spielsache büschele. Dasmal si 39 Chind mit ihrne Spielsache id Turnhalle cho und hei dä Märit mit fröhlichen Kinderschnatter beläbt. Gäge Durst und Hunger si mir ou gwappnet gsi und hei 22l Kürbissuppe usgschänkt. Dr Erlös hei mir de er Gmeind Blatte im Lötschetal gspändet.

Am Pousemilchtag ändi Oktober hei mir a dene 4 Standorte: Mirchel, Oberhünige, Kindergarte und Schuel Zäzi insgesamt 46l Milch usgschänkt. Es isch immer e lustige Aktion: ds Schuellüüti klinggelet, es räblet und motoret hurti, einigi nähme kei Milch und bi andere säge mir nachem 5. Bächer : bisch sicher, dass du när nid mits ir Schuelstund es Problem hesch!? Und nach 30 minute isch dr ganz Spuk verbi.

Afangs Novämber si 30 froue und 2 Manne mitem Hirsbrunnercar uf Aarau a Rüebliärit. Es isch e sehr schöne, gmüetliche und zfriedne Tag gsi. Die Vielfalt und die liebevolle, und lustige Dekoratione mit denä Rüeblu und wiiterem Gmües hei üs begeistert.

Mitti Novämber hei e buntgmischti Frouetruppe im Näihatelier vor Rahel Nater wieder Bonding-Härzli gnäiht, die farbige Stoffhärzli, wo mir dr Neonatologie im Inselspital Bärn spände. Ganzi 55 Härzli-Paar hei mir gmacht. Und we dir itz dänket, dass chönne nur Näihprofis de säge ig öich: im Härzliteam hets für aui e Ufgab, schnide, güffele, näihe, kehre, glette und am Schluss die 2 gliiche zäme biggele....I ha die de imne Päckli richtig Bärn gschickt und glii druf es hätzlichs Dankemail zrugg ubercho mitem Vermerk: gäu, mir chöi nächst Jahr wieder uf Öich zeue?

Wes de gäge d Adväntszyt geiht mache mir wie jedes Jahr im Uftrag vor Gmeind Zäziwil d Adväntsbescherig und bsueche die ältischi Generation unter üs. Mit üsne flissige Hälferinne si die 25 Persone mit Honig oder ere Blueme überrascht worde. Mir si richtig glücklich gsi, dass mir uf üser Froue im Verein hei dörfe zeue, wo üs so tatkräftig unterstützt hei.

Im Dezämber het d Sandra wieder bim Zämä-Ässe dörfe ineluegä und dert im Name vo üsem Verein d Kaffirundi gspändiert.

Mitti Dezämber isch de ou dr letscht Alass i dä 2025 gsi, nämlich d Seniorewiehnachte. 32 Seniorinne und Seniore si vo de jüngste Schüelerinne und Schüeler vor Zäzi-Schuel miteme Gschichtemusical überrascht worde. Ou dr Pfarrer het no es paar Wort parat gha und de si mir de i gmüetlich Teil übere mit Kaffe und Kueche und em beliebte Schätzspiel. D Kollekte hei mir er Verinigung Reddog, de Schwiizer Such-und Rettigshund gspändet.

Afangs Jahr hei mir üses Vorstandsässe gnosse bim Issfäld-Beizli ds Langnou. Da mir mit Glühwy gstartet sii hei mir de ds Schlöffle grad lah sii.

Mitti Februar hei mir de no üse Spielabe gha, 12 Persone us vier verschiedene Generatione hei zämä gspielt. Es isch immer e gsellige Abe wo viel glachet wird und nöii Bekantschafte gschlosse wärde.

Ou i däm Vereinsjahr si verschideni Kurse und Vorträg düregführt worde. Vo sportlich, über kreativ bis zu spezifischem Wüsse hei üser kursverantwortliche Froue, Jolanda und Eveline es interessants Programm gha.

D Annemarie isch ds oberhoupt vo üser Reiseabteilig und het immer cooli und interssanti Idee.

Ou üse Pizaofe het ume mängs Fescht beriicheret und isch 19 mal unterwegs gsi, Karin het ziemlich ztüe gha mitem Checkout und Checkin vo däm Wägeli.

Ir Brocki hei mir, und bsunders üsi nöii Brockichefin Monika, wiederum uf üser engagierte Froue vom Brockiteam dörfe zeue.

Füre Informationsfluss brieflich, per Mail oder Website und Kasse luegä d Marianne, Sabrina und Sandra immer, dass alles korrekt isch.

I bi dankbar, ha ig so es super Vorstandsteam, wo mir i vielne Beriiche dr Rügge frei het und Zueverlässig mitschaffet, Kontakte knüpft, und apackt. Das isch nid sälvsverständlich, schliesslich si die meiste hüt no i andere Bereiche gforderet: Familie, Partnerschaft, Bruef und und und...Immer

alles unger ei Huet ds bringe und gleichzeitig für ne gsundi Work-Life-Balance ds luegä isch nid immer eifach und genau darum darf me nid vergässe, dass üsi soziale interakione, üses Schaffe i versch. Vereine und Mitwirke ir Gsellschaft sehr wichtig und e grosse Respekt verdienet. Ohni üser Froue im Vorstand und ohni üser engagierte Mitglieder, wo üs immer wieder unterstütze würd ds Zäziwil und ds Mirchel ganz viel Läbensqualität und Dorfläbe fähle. Drum säge ig vo Härze: Danke viuviumau, liebi Froue, dass dir üses Vereinsläbe hälftet pflege. E grosse Dank geht ou a üser Gmeinde und ad Kirchgmeind, wo üs bi üser Arbeit unterstütze.

I fröie mi uf ds nöie Vereinsjahr und bi gspannt, was mir wieder alles dörfe erläbe und uf d Beii steue.

Rüttene, 28. Febuar 2026    Öii Präsidentin Regina Schüpbach